

Pader Lampe ta un Agitador, no un pastor!

E ta causando un daño grandi na Iglesia Catolico...

ORANJESTAD(AAN)E telefonnan di DIARIO no a stop di sona henter dia ayera, y mayoria di nan cu keho contra e actitud y e palabranan di Pader Lampe. Un agitador disfraz di pastor, cu a kere cu e por atenta contra democracia na Aruba y dje core bay sconde tras di su condicion di sacerdote. Cosnan no ta funciona asina! Pa haya respet bo mester duna respet!

Con un pastor por bay sinta alimenta accionnan cu ta bay linea recta contra e decision di un Huez? Con e por bay sinta grita cu no mester para e accionnan te ora Gobierno baha? Ta ken por respeta un elemento cu ta abusa di su condicion di pastor pa sembra su veneno den un poblacion trankilo y amante di paz?

"E homber ey no ta un pastor Catolico, e ta un comunista cu kier bolter nos paz social for di otro," un persona cu a yama a declara. "Mi tin entendi cu e mester a huy di

Mexico pasobra nan tabata cla pa linche," otro a laga sa. "No Boneiro nan mester a core cune pa e no sigui causa daño na e isla pacifico ey," otro fiel lector di DIARIO a duna di conoce.

"Ta trata di un elemento hopi dañino, cu no ta predica Evangelio sino odio," otro a laga sa. Y asina e yamadanan tabata dreña un tras di otro, mayoria di nan di Catoliconan cu a declara na DIARIO cu 'Pader' Lampe ta haciendo un daño inmenso na Iglesia Catolico cu su actitud anarkico.

Ningun hende na DIARIO a lubida con e mesun 'Pader' Lampe aki a fulmina contra e Gobierno di Nel den pasado. O sea cu e ta, di naturaleza, un agitador profesional! Y pa un elemento manera Johnny Habibe bin sinta pidi pa tene consideracion cune pasobra e ta un pastor, siendo cu e Habibe ey ta un di e elementonan cu mas daño a causa

Aruba y a permiti pa mas hende ser ofendi sin misericordia via su radio, ta e colmo di cinismo. Su radio mester a ser clausura hopi tempo pasa, pero ta e tolerancia di e Gobierno actual a permitie sigui opera.

'Pader' Lampe ta un simpel agitador, esey el a demonstra den e ultimo dianan. E no tabata interesa den paz ni calma, sino tabata cucuya manera un demente contra e orden social estableci segun e Constitucion di Aruba. Na lugar di pidi e fielnan reza na Dios pa ilumina nan, pa amor y no odio dreña nan curazonnan, el a para predica un letania di odio inaceptabel for di un sacerdote.

Kico Obispo ta bay haci cune DIARIO no sa, pero mester hinc den su cabez cu e ta un Ministro di Dios, no di Anarkia, cu su mision ta predica Evangelio, no odio entre e poblacion pacifico di Aruba.